

每週經課朗誦經文(巴克禮台語漢字)2013/10/27

共同經課 - 1 約珥書二章二十三節~三十二節

23 錫安的百姓啊，恁著快樂，爲耶和華——恁的上帝來歡喜；因爲伊用前的雨及時賞賜恁，爲著恁落雨水，就是前的雨、後的雨，及以前一樣。24 五穀場欲有麥滿滿；窟中的新酒及油欲滿出來。25 我差到恁中間的大軍隊，就是第一種、第二種、第三種、第四種的草蟲，所食許個年冬，我攏欲還恁。26 恁欲食來知足，亦欲謳唵恁的上帝——耶和華的名。因爲伊爲著恁行奇妙的事，我的百姓的確永遠無見誚。27 恁就欲知我佇以色列的中間，閣知我是耶和華——恁的上帝；以外無別個。我的百姓的確永遠無見誚。28 了後，我欲用我的神降落互凡有肉體者。恁的子查某子欲做先知講話；恁的老人欲得著眠夢，恁的少年人欲看見異象。29 佇許個日，我欲用我的神降落佇奴僕奴婢。30 「我欲顯明奇事，佇天裡佇地裡，血及火，及火熏的柱。31 日頭欲變黑暗，月欲變做血，佇耶和華大閣通驚的日未到的代先。32 到彼時，見有求叫耶和華的名者欲得著救；因爲佇錫安山，及佇耶路撒冷欲有逃脫的人，照耶和華所講的佇剩的百姓中欲有耶和華所召者。」

共同經課 - 2 詩篇六十五篇

1 [大衛的詩歌，交互樂官。] 上帝啊，佇錫安有人謳唵聽候你；亦欲對你謝所下的願。2 聽人祈禱的主啊，見有血氣的攏欲就近你。3 罪惡卡羸我；論到阮的過失，你攏欲赦免。4 你所揀選、互伊親近你、踮佇你的院內者，此號人有福氣！阮欲因爲你的厝、你的聖殿的福氣來心滿意足。5 救阮的上帝啊，你欲用威嚴秉公義來應阮；你是地極及海面遠遠的人攏總所倚靠者。6 伊已經用大權能結腰，就用伊的氣力安定諸個山。7 諸個海嘩嘩哮及其中海湧嘩嘩哮，以及萬百姓的喧嘩，伊互 in 平靜。8 倚起地極的人因爲你的神蹟來驚惶；日出日落的所在你互 in 攏歡喜。9 你眷顧土地，落雨灌沃伊，互伊真肥。上帝的河，伊的水滿滿；你按呢備辦土地，就是替人備辦五穀。10 你灌沃田園滿伊的溝，修平伊的稜，落好的雨水，互土地軟軟；其中所發生的，得著你賜福。11 你用你的恩典做年冬的冕旒；你的路徑攏有油滴。12 滴佇曠野的草埔。山頭用歡喜做帶來緒；13 草埔用羊群做衫來穿；山谷用五穀做斗來蓋。in 攏歡喜出聲來吟詩。

共同經課 - 3 提摩太後書四章六節~八節，十六節~十八節

6 因爲今我的血啲做灌奠，我過世的期到啦。7 我已經爭戰好的爭戰，已經盡跑走的路站，已經守所信的道理。8 今了後，有義的冕旒給我備辦下啲，就是主做公義的審判司佇彼日欲互我；毋若互我，也欲互見若欣慕伊顯現的人。16 我頭一擺分訴的時，無人倚近我，眾人攏離開我；願此個罪無歸佇 in。17 若是主倚佇我身邊，互我勇健，互所著宣傳的對我來一盡報揚，閣互外邦攏聽見；我也得著救出佇獅的嘴。18 主欲救我脫離攏總的歹代，也欲救我入佇伊天裡的國。願榮光歸伊，到代代無盡。阿們。

共同經課 - 4 路加福音十八章九節~十四節

9 有倚靠家已做義，來看輕別人的，耶穌設一個譬喻給 in 講：10 「有二人上殿欲祈禱：一個是法利賽人，一個是抽餉的。11 法利賽人倚啲，家已祈禱講：『上帝啊，我感謝你，因爲我無親像別人勒索、不義、姦淫，也無親像此個抽餉的。12 我一禮拜禁食二擺，閣將凡所得著的十份抽一份。』13 若是彼個抽餉的遠遠倚啲，連抬目向天也毋敢，干單搥胸講：『上帝啊，憐憫我此個有罪的人！』14 我給恁講，此個人倒去伊的厝得著稱做義羸過彼個人；因爲，見若自高的，欲互伊卑微；家已卑微的，欲高升伊。」